

摘藻堂四庫全書薈要

史部

欽定四庫全書薈要卷六千四百二十四史部

元史卷四十五

明翰林學士亞中大夫知制誥兼修國史宋濂等修

本紀第四十五

順帝八

十七年春正月丙子朔日有食之以已延特古斯為大
司徒辛卯命山東分省團結義兵每州添設判官一員
每縣添設主簿一員專率義兵以事守禦仍命各路達

噶齊提調聽宣慰使司節制丙申監察御史哈喇章
言淮東道廉訪使褚布哈徇忠盡節宜加褒贈優恤其
家從之二月壬子賊犯七盤藍田命察罕特穆爾以軍
會達爾瑪雅爾守陝州潼關哈喇布哈由潼關抵陝西
會豫王喇特納實哩鼎珠等同進討癸丑太陰犯五
車以征河南許亳太康嵩汝大捷詔赦天下戊辰知樞
密院事托克托復邳州調客省使蘇爾塔琿等攻黃河
南岸賊大破之壬申劉福通遣其黨毛貴陷膠州僉樞

密院事托歡死之甲戌倪文俊陷陝州是月李武崔德
陷商州察罕特穆爾與李思齊以兵自陝號援陝西以
察罕特穆爾為陝西行省左丞李思齊為四川行省左
丞高寶為四川行省參知政事將兵取中興不克賊遂
破輓轡關三月乙亥朔義兵萬戶賽富鼎阿穆爾丹叛
據泉州庚辰毛貴陷萊州守臣山東宣慰副使沙克嘉
鼎死之壬午大明兵取常州路甲申太陰犯鬼宿壬辰
歲星犯壘壁陣甲午毛貴陷益都路益王邁努遁自是

山東郡邑皆陷乙未以江淮行樞密院副使董搏霄為
山東宣慰使丁酉毛貴陷濱州戊戌以中書平章政事
特哩特穆爾為御史大夫烏蘭哈達鄂蘭並為中書平
章政事夏四月丙午監察御史五十九言今京師周圍
雖設二十四營軍卒疲弱素不訓練誠為虛設儻有不
測誠可寒心宜速選擇驍勇精銳衛護大駕鎮守京師
實當今奠安根本固堅人心之急務況武備莫重于兵
而養兵莫先于食今朝廷撥降鈔錠措置農具命總兵

官于河南克復州郡且耕且戰甚合寓兵于農之意為
今之計權命總兵官從宜于軍官府選委能撫字軍民
者兼路府州縣之職務要農事有成軍民得所則擾民
之害益除而匱乏之憂亦釋矣帝嘉納之乙卯毛貴陷
莒州丙辰京師立便民六庫倒易昏鈔辛酉以約約為
甘肅行省左丞相達實巴圖爾加太尉四川行省左丞
相漢中道廉訪司糾陝西行省左丞蕭嘉努遇賊逃竄
失陷所守郡邑詔正其罪是月車駕時巡上都封江西

行省平章政事和尼齊為營國公大明兵取寧國路五月乙亥命知樞密院事布呼齊進兵討山東戊寅平章政事齊拉衮特穆爾復武安州等三十餘城丙申命吹斯戩為右丞相太平為左丞相詔天下免民今歲稅糧之半詔以永昌宣慰司屬詹事院六月甲辰朔以賈勅們為中書分省右丞守濟寧丙辰監察御史托克托穆爾言去歲河南賊窺伺河北惟河南與山東互相策應為害尤大為今之計中書當選能將就台哈布哈達實

巴圖爾阿魯三處軍馬內擇其精銳以守河北進可以
制河南之侵退可以攻山東之寇庶幾無虞從之己未
以特哩特穆爾魯達實並為御史大夫庚申大明兵取
江陰州壬申特哩特穆爾糾陝西知行樞密院事額森
特穆爾遂命罷陝西行樞密院令額森特穆爾居于草
地癸酉溫州路樂清江中龍起颶風作有火光如毬是
月劉福通犯汴梁其軍分三道關先生破頭潘馮長舅
沙劉二王士誠寇晉冀白不信大刀教李喜喜趨關中

毛貴據山東其勢大振秋七月己卯特哩特穆爾奏續

集風憲宏綱庚辰大明兵取徽州路癸未太白犯鬼宿

甲申太陰犯斗宿乙酉命右丞相吹斯戩領宣政院事

平章政事藏布知經筵事參知政事李穆同知經筵事

參知政事諤勒哲特穆爾兼太府卿丁亥填星犯鬼宿

戊子以李穆為御史中丞中書省言山東般陽益都相

次而陷濟南日危宜選將練卒信賞必罰為保燕趙計

以衛京師不報己丑鎮守黃河義兵萬戶田豐叛陷濟

寧路分省右丞實勒們遁義兵萬戶孟本周攻之田豐
敗走本周還守濟寧甲午以御史中丞諤勒哲特穆爾
為中書右丞河南廉訪使溫普為中書參知政事監察
御史德呼默色劉傑言疆域日蹙兵律不嚴陝西汴梁
淮潁山東之寇有窺伺燕趙之志宜俯詢大臣共圖克
復預策守備不報是月立四方獻言詳定使司秩正三
品歸德府知府林茂萬戶時公權叛以城降于賊歸德
府及曹州皆陷八月癸卯填星犯鬼宿太白犯軒轅癸

丑劉福通兵陷大名路遂自曹濮陷衛輝路達實巴圖爾之子博羅特穆爾與萬戶方托克托擊之甲子太陰犯五車乙丑以陝西行臺御史中丞伯奇襲爾為陝西行省平章政事淮南行省參知政事余闕為淮南行省左丞江浙行省參知政事楊諤勒哲陞左丞方國珍為江浙行省參知政事海道運糧萬戶如故丙寅慶陽府鎮原州大雹是月大駕還自上都薊州大水詔知樞密院事努都爾噶討山東大明兵取揚州路平江路張士

誠俾前江南行臺御史中丞曼濟哈雅為書請降江浙
左丞相達實特穆爾承制令參知政事周伯琦等至平
江撫諭之詔以士誠為太尉士德為淮南行省平章政
事時士德已為大明兵所擒九月丙子命同知樞密院
事壽通以兵討寇州以魯達實為中書省平章政事兼
烏蘭哈雅指揮使甲午澤州陵川縣陷縣尹張輔死之
戊戌台哈布哈復大名路并所屬郡縣辛丑詔中書右
丞額森布哈御史中丞成遵宣撫彰德大名廣平東昌

東平曹濮等處獎厲將帥是月命努都爾噶加太尉總
諸軍守禦東昌時田豐據濟寧率衆來寇擊走之倪文
俊謀殺其主徐壽輝不果自漢陽奔黃州壽輝僞將陳
友諒襲殺之友諒遂自稱平章閏九月癸卯有飛星如
盃青色光燭地尾約長尺餘起自王良没于勾陳監察
御史多爾濟等劾知樞密院使哈喇巴圖爾失陷所守
郡縣詔正其罪丙午太陰犯斗宿右丞相吹斯戩左丞
相太平並加開府儀同三司平章政事諤勒哲布哈兼

大司農庚申太陰犯井宿乙丑潞州陷丙寅賊攻冀寧
察罕特穆爾以兵擊走之冬十月乙亥熒惑犯氐宿戊
寅設分詹事院甲申太陰掩昴宿戊戌曹州賊入太行
山是月白不信大刀教李喜喜陷興元遂入鳳翔察罕
特穆爾李思齊屢擊破之其黨走入蜀達實巴圖爾與
知樞密院事達爾瑪實哩以軍討曹州賊官軍敗潰達
爾瑪實哩死之靜江路山崩地陷大水十一月辛丑山
東道宣慰使董搏霄建言請令江淮等處各枝官軍分

布連珠營寨于隘口屯駐守禦宜廣屯田以足軍食從

之汾州桃花壬寅賊侵壺關察罕特穆爾大破之戊

午以河南行省平章政事達蘭為中書平章政事御史

中丞李獻為中書左丞陝西行臺中丞已延特穆爾樞

密院副使哈喇諾海司農少卿崔敬侍御史陳敬伯皆

為參知政事癸亥豫王喇特納實哩與陝西行省左丞

相托多陝西行臺御史中丞伯奇羅爾分道攻討關陝

己巳以中書參知政事已特瑪實哩為右丞十二月庚

午朔熒惑犯天江辛未山東廉訪使已延布哈建言嚴
保伍集勇健汰冗官戊寅太白犯歲星甲申太陰犯鬼
宿丁亥歲星犯壘壁陣庚寅太白犯壘壁陣癸巳太陰
犯心宿丁酉慶元路象山縣鵝鼻山崩己亥流星如金
星大尾約長三尺餘起自太陰近東而沒化為青白氣
庚子達實巴圖爾卒于軍中是歲詔天下團結義兵路
府州縣正官俱兼防禦事詔淮南行知樞密院事托克
托領兵討淮南詔諭濟寧李秉彝田豐等令出降敘復

元任嘯亂士卒仍給資糧欲還鄉者聽倪文俊陷川蜀
諸郡命偽元帥明玉珍守據之趙均用及彭大之子早
住同據淮安趙僭稱永義王彭僭稱魯淮王義兵千戶
余寶殺其知樞密院事寶通以叛降于毛貴余寶遂據
棣州河南大饑

十八年春正月辛丑填星犯鬼宿乙巳察罕特穆爾李
思齊合兵于鳳翔丙午太陰犯昴宿陳友諒陷安慶路
守將余闕死之庚戌大明兵取婺源州甲子以布哈齊

知樞密院事乙丑大風起自西北益都土門萬歲碑仆而碎丙寅田豐陷東平路丁卯布哈齊與毛貴戰于好石橋敗績走濟南是月詔達實已圖爾子博囉特穆爾為河南行省平章政事總領其父元管軍馬詔察罕特穆爾屯陝西李思齊屯鳳翔二月己巳朔議團結西山寨大小十一處以為保障命中書右丞達實特穆爾左丞烏克遜良楨等總行提調設萬夫長千夫長百夫長編立牌甲分守要害互相策應毛貴陷清滄州遂據長

蘆鎮中書省臣奏以陝西軍旅事劇務殷去京師道遠
供費艱難請就陝西印造寶鈔為便遂分戶部寶鈔庫
等官置局印造仍命諸路撥降鈔本昇平準行用庫倒
易昏幣布于民間癸酉毛貴陷濟南路守將阿達戰死
毛貴立賓興院選用故官以姬宗周等分守諸路又于
萊州立三百六十屯田每屯相去三十里造大車百輛
以挽糧儲官民田十分收二冬則陸運夏則水運乙亥
填星犯鬼宿辛巳詔以台哈布哈為中書右丞相總兵

山東壬午田豐復陷濟寧路甲申輝州陷丙戌努都爾
噶聞田豐逼近東昌棄城走丁亥察罕特穆爾調兵復
涇州平涼保鞏昌戊子田豐陷東昌路庚寅王士誠自
益都犯懷慶路周全擊敗之辛卯以安圖為中書參知
政事丁酉興元路陷三月己亥朔日色如血加右丞相
吹斯戩太保庚子毛貴陷般陽路辛丑大同路夜黑氣
蔽西方有聲如雷少頃東北方有雲如火交射中天遍
地俱見火空中有兵戈之聲癸卯王士誠陷晉寧路總

管杜賽音布哈死之甲辰察罕特穆爾遣賽音齊等復
晉寧路己酉劉福通遣兵犯衛輝博囉特穆爾擊走之
庚戌毛貴陷薊州詔徵四方兵入衛乙卯毛貴犯鄴州
至棗林樞密副使達國珍戰死遂畧柳林同知樞密院
事劉哈喇布哈以兵擊敗之貴走據濟南丙辰大明兵
取建德路以周全為湖廣行省參知政事統鄂囉等軍
移鎮嵩州白龍寨冀寧路陷丁巳田豐陷益都路辛酉
大同諸縣陷察罕特穆爾遣關保等往擊之是時賊分

二道犯晉冀一出沁州一侵絳州乙丑以婁章為太子

少保夏四月甲戌陳友諒陷龍興路省臣道通和尼齊

棄城遁壬午田豐陷廣平路大掠退保東昌詔元帥方

托克托以兵復廣平癸未以諸處捷音屢至詔頒軍民

事宜十一條庚寅以翰林學士承旨曼濟為嶺北行省

平章政事辛卯太白犯鬼宿甲午陳友諒遣王奉國陷

瑞州路是月車駕時巡上都察罕特穆爾李思齊會宣

慰張良弼郎中郭擇善宣慰同知拜特穆爾平章政事

鼎珠總帥汪長生努各以所部兵討李喜喜于鞏昌李喜喜敗入蜀察罕特穆爾駐清秋李思齊駐斜坡張良弼駐秦州郭擇善駐崇信拜特穆爾等駐通渭鼎珠駐臨洮各自除路府州縣官徵納軍需李思齊張良弼又同襲殺拜特穆爾分總其兵五月戊戌朔察罕特穆爾遣董克昌等以兵復冀寧以方國珍為江浙行省左丞兼海道運糧萬戶詔察罕特穆爾還兵鎮冀寧李思齊殺同僉樞密院事郭擇善庚子賊兵踰太行察罕特穆

爾部將關保擊敗之以察罕特穆爾為陝西行省右丞
兼陝西行臺侍御史同知河南行樞密院事劉福通攻
汴梁壬寅太白犯填星汴梁守將珠展棄城遁福通等
遂入城乃自安豐迎其偽主居之以為都陳友諒遣康
泰趙琮鄧克明等以兵寇郛武路申辰命太尉昂吉爾
為甘肅行省左丞相乙巳關保與賊戰于高平大敗之
庚戌陳友諒陷吉安路壬子太陰犯斗宿癸丑監察御
史七十等劾太保中書右丞相台哈布哈乙卯詔削台

哈布哈官爵安置蓋州時台哈布哈總兵山東以知行

樞密院烏蘭哈達代之並命其節制河北諸軍河南行

省平章政事周全節制河南諸軍辛酉陳友諒兵陷撫

州路甲子監察御史七十楊珠布哈等劾中書參知政

事楊珠布哈是月遼州蝗山東地震天雨白毛察罕特

穆爾自擢劉尚質冀寧路總管六月戊辰朔台哈布哈

伏誅察罕特穆爾調浩爾齊闕保同守潞州拜察罕特

穆爾陝西行省平章政事便宜行事庚辰闕先生破頭

潘等陷遼州浩爾齊以兵擊走之關先生等遂陷冀寧
路乙酉命左丞相太平督諸軍守禦京城便宜行事是
月汾州大疫秋七月丁酉朔周全據懷慶路以叛附于
劉福通時察罕特穆爾駐軍洛陽遣拜特穆爾以兵守
盩子城周全來戰拜特穆爾為其所殺周全遂盡驅懷
慶民渡河入汴梁丁未太陰犯斗宿布呼齊以兵復般
陽路已而復陷戊申太白晝見癸丑有賊兵犯京城刑
部郎中布哈守西門夜開門擊退之己未劉福通遣周

全引兵攻洛陽守將登城以大義責全全愧謝退兵劉
福通殺之丙寅以旺布哈托克托特穆爾為中書平章
政事是月京師大水蝗民大饑八月丁卯朔江浙行省
平章政事薩木丹巴勒遁于福建先是薩木丹巴勒討
饒州貪財玩寇久而無功遂妄稱遷職福建行省至則
為廉訪僉事已喇密特特穆爾所劾拘之興化路壬申
太陰掩心宿庚辰陳友諒兵陷建昌路辛巳義兵萬戶
王信以滕州叛降于毛貴甲申太陰掩昴宿庚寅以魯

達實為御史大夫詔作新風紀九月丁酉朔詔授實保
特穆爾同知河東宣慰司事其妻拉拜哈屯雲中郡夫
人子觀音努贈同知大同路事仍表其門閭初實保特
穆爾為趙王位下同知齊哩克昆總管府事其妻嘗保
育趙王及是部落默呼叛欲殺王實保特穆爾與妻謀
以子觀音努服王衣冠居王宮夜半夫妻衛趙王微服
遁賊至遂殺觀音努趙王得免事聞故旌其忠焉褒封
唐贈諫議大夫劉蕡為文節昌平侯關先生攻保定路

不克遂陷完州掠大同興和塞外諸郡中書左丞張冲
請立團練安撫勸農使司二道一奉元延安等處一鞏
昌等處從之壬寅詔命中書參知政事布延布哈治書
侍御史李國鳳經畧江南癸卯詔以福建行中書省平
章政事慶通為江南行臺御史大夫丙午賊兵攻大同
路壬戌平定州陷乙丑陳友諒陷贛州路江西行省參
知政事沁布阿咱爾及總管噶海齊死之冬十月丙寅朔
詔豫王喇特納實哩徙居白海尋遷六盤壬申大明

兵取蘭溪州己卯太陰犯昴宿壬午監察御史楊珠布
哈劾右丞相吹斯戩罪狀詔收其印綬乙酉監察御史
達爾瑪實哩王彝等復劾之請正其罪不聽壬辰大同
路陷達魯噶齊諤勒哲特穆爾棄城遁十一月乙未朔
以布哈特穆爾為福建行省平章政事癸卯陳友諒陷
汀州路丙午太陰犯昴宿太白犯房宿丁未田豐陷順
德路先是樞密院判官劉起祖守順德糧絕劫民財掠
牛馬民強壯者令充軍弱者殺而食之至是城陷起祖

遂盡驅其民走于廣平辛酉太陰掩心宿十二月乙丑
朔日有食之癸酉關先生破頭潘等陷上都焚宮闕留
七日轉畧往遼陽遂至高麗戊寅太白經天庚辰察罕
特穆爾遣樞密院判官索珠進兵于遼陽癸未太白經
天甲申大明兵取婺州路達魯噶齊僧珠浙東廉訪使
楊惠死之戊子太陰犯房宿

十九年春正月甲午朔陳友諒兵陷信州路守臣江東
廉訪副使巴延布哈德濟力戰死之大明兵取諸暨州

辛丑太陰犯昴宿乙巳以多爾濟巴勒為中書平章政事丙午遼陽行省陷懿州路總管呂震死之贈震河南行省左丞封東平郡公察罕持穆爾遣樞密院判官陳秉直班布爾實將兵二萬守冀寧癸丑流星如酒盃大有聲如雷二月辛巳樞密副使多爾濟以賊犯順寧命張立將精銳由紫荆關出討雅勒呼由北口迎敵甲申叛將梁炳攻辰州守將和尚擊敗之以和尚為湖廣行省參知政事賊由飛狐靈邱犯蔚州庚寅御史臺臣言

先是召募義兵費用銀鈔一百四十萬錠多近侍權倖冒名闕支率為虛數乞令軍士凡已領官錢者立限出征詔從之已而復止不行是月詔博囉特穆爾移兵鎮大同以為京師捍蔽置大都督兵農司仍置分司十道專督屯種以博囉特穆爾領之所在侵奪民田不勝其擾台哈布哈潰散兵數萬鈔掠山西察罕特穆爾遣陳秉直分兵駐榆次招撫之其首領悉送河南屯種三月癸巳朔陳友諒遣兵由信州畧衢州復遣兵陷襄陽路

辛丑京城北兵馬司指揮周哈喇岱與林智和等謀叛
事覺伏誅庚戌太陰犯房宿壬戌詔定科舉流寓人名
額蒙古色目南人各十五名漢人二十名夏四月癸亥
朔汾水暴漲賊陷金復等州司徒知樞密院事佛嘉努
調兵平之甲子毛貴為趙均用所殺帝以天下多故卻
天壽節朝賀詔羣臣曰朕方令宜敬天地法祖宗以自
修省朕初度之日羣臣毋賀庚午左丞相太平暨文武
百官奏曰天壽節朝賀乃臣子報本實合禮典今謙讓

不受固陛下盛德然今軍旅征進君臣名分正宜舉行
不允壬申皇太子復率羣臣上奏曰朝賀祝壽是祖宗
以來舊行典故今不行有乖于禮帝曰今盜賊未息萬
姓荼毒正朕恐懼修省敬天之時奈何受賀以自樂乙
亥御史大夫特哩特穆爾復奏曰天壽朝賀之禮蓋出
臣子之誠伏望陛下曲徇所請若朝賀之後內庭燕集
特賜除免亦古者人君減膳之意仍乞宣示中書使內
外知聖天子憂勤惕厲至于如此帝曰為朕缺于修省

以致萬姓塗炭今復朝賀燕集是重朕之不德當候天
下安寧行之未晚卿等其無復言卒不聽己丑賊陷寧
夏路遂畧靈武等處五月壬辰朔以陝西行臺御史大
夫諤勒哲特穆爾為陝西行省左丞相便宜行事丙申
熒惑犯鬼宿丁酉皇太子奏請巡北邊以綏軍民御史
臺臣上疏固留詔從之壬寅察罕特穆爾請令歲八月
鄉試河南舉人及避兵儒士不拘籍貫依河南省元定
額數就陝州置貢院應試詔從之丙午太陰犯天江丁

未太陰犯斗宿是月察罕特穆爾大發秦晉諸軍討汴
梁圍其城山東河東河南關中等處蝗飛蔽天人馬不
能行所落溝塹盡平民大饑六月辛巳以宣徽使雅克
科爾為御史大夫秋七月壬辰朔出吹斯噶為遼陽行
省左丞相便宜行事丁酉太白犯上將庚子詔以察汗
諾爾宣慰司之地屬資政院有司毋得差占察汗諾爾
之地在世祖時隸蒙古岱太子四千戶今從皇后奇氏
請故以屬之資政院甲辰太白犯右執法戊申命國王

囊嘉特中書平章政事佛嘉努額森布哈知樞密院事
赫魯等統領特默齊軍進征遼陽己酉太白犯左執法
丙辰趙均用既殺毛貴其黨續繼祖自遼陽入益都殺
均用遂與其所部自相讐敵是月霸州及介休縣靈石
縣蝗八月辛酉朔倪文俊餘黨陷歸州戊寅察罕特穆
爾督諸將閻思孝李克彝浩爾齊賽音齊達呼托音布
哈呂文鄂勒哲賀宗哲孫翥等攻破汴梁城劉福通奉
其偽主遁據安豐己卯蝗自河北飛渡汴梁食田禾一

空詔以察罕特穆爾為河南行省平章政事兼同知河南行樞密院事陝西行臺御史中丞依前便宜行事仍賜御衣七寶腰帶以旌其功是月大同路蝗襄垣縣螟螣九月癸巳以中書平章政事特哩特穆爾為陝西行省左丞相便宜行事乙巳以湖南北浙東西四道廉訪司所治之地皆陷詔任其所便之地置司丙午夜白虹貫天丁未禁軍人不得私殺牛馬甲寅太白犯天江是月大明兵取衢州路詔遣兵部尚書巴延特穆爾戶部

尚書曹履亨以御酒龍衣賜張士誠徵海運糧冬十月
庚申朔詔京師十一門皆築甕城造吊橋以方國珍為
江浙行省平章政事壬申太白犯斗宿辛巳流星大如
桃十一月癸卯大明兵取處州路戊申陳友諒兵陷杉
關十二月戊辰太白犯壘壁陣是月知樞密院事烏蘭
哈達領台哈布哈軍時所部方托克托與弟拜特穆爾
保遼州烏蘭哈達同唐琰高托音等屯孟州與察罕特
穆爾部將班布爾實等交兵已而烏蘭哈達獨引達勒

達軍還京方托克托等乃從博囉特穆爾皇太子憾太平忤已以中書左丞成遵參知政事趙中皆太平所用使監察御史誣遵中以賊罪杖殺之是歲以後因上都宮闕盡廢大駕不復時巡陳友諒以江州為都迎偽主徐壽輝居之自稱漢王

二十年春正月己丑朔察罕特穆爾請以鞏縣改立軍州萬戶府招民屯種從之御史大夫魯達實御史中丞耀珠奏今後各處從宜行事官員毋得陰挾私讐明為

舉索輒將風憲官吏擅自遷除侵擾行事沮壞臺綱從之己亥太陰犯井宿癸卯大寧路陷壬子以危素為參知政事乙卯會試舉人知貢舉平章政事已特瑪實哩同知貢舉翰林學士承旨李好文禮部尚書許從宗考試官國子祭酒張翥同考官太常博士傅亨等奏舊例各處鄉試舉人三年一次取三百名會試取一百名今歲鄉試所取比前數少止有八十八名會試三分內取一分合取三十名如于三十名外添取五名為宜從之

丙辰五色雲見移時二月戊午朔左丞相太平罷為太
保留守上都三月戊子朔田豐陷保定路彗星見東方
甲午廷試進士三十五人賜邁珠魏元禮進士及第餘
出身有差乙巳冀寧路陷壬子以吹斯戩為中書右丞
相夏四月庚申命大司農司都事樂元臣招諭田豐至
其軍為豐所害丁卯太陰犯明堂辛未僉行樞密院事
張居敬復興中州癸酉太陰犯東咸五月丁亥朔日有
食之雨雹陳友諒殺其僞主徐壽輝于太平路遂稱帝

號大漢改元大義己而回駐于江州乙未陳友諒遣羅
中顯陷辰州己亥以班珠爾瑪克為中書平章政事壬
寅太陰犯建星是月張士誠海運糧十一萬石至京閏
月己未以太尉雅克特穆爾知經筵事以甘肅行省左
丞相昂吉爾為太尉乙亥流星大如桃六月己丑命博
囉特穆爾部將方托克托守禦嵐興保德州等處詔令
後察罕特穆爾與博囉特穆爾部將毋互越境侵犯所
守信地因而讐殺方托克托不得出嵐興州境界察罕

特穆爾亦不得侵其地癸巳太白犯井宿戊戌太陰犯
建星是月大明兵取信州路秋七月辛酉命遼陽行省
參知政事張居敬討義州賊博囉特穆爾敗賊王士誠
于臺州乙丑太陰犯井宿乙亥詔博囉特穆爾總領達
勒達漢兒軍馬為總兵官便宜行事八月戊子命博囉
特穆爾守石嶺關以北察罕特穆爾守石嶺關以南辛
卯太陰犯天江壬辰加封福建鎮閩王為護國英仁武
烈忠正福德鎮閩尊王乙未永平路陷壬寅填星犯太

微甲辰太陰犯井宿詔諸處所在權攝官員專務漁獵
百姓今後非朝廷允許不得之任庚戌詔江浙行省左
丞相達實特穆爾加太尉兼知江浙行樞密院事提調
行宣政院事便宜行事九月乙卯朔詔遣參知政事額
森布哈往諭博囉特穆爾察罕特穆爾令講和時博囉
特穆爾調兵自石嶺關直抵冀寧圍其城三日後退屯
交城察罕特穆爾調參政閻奉先引兵與戰已而各于
石嶺關南北守禦壬戌賊陷孟州又陷趙州攻真定路

癸未賊復犯上都右丞孟克特穆爾引兵擊之敗績冬
十月甲申朔甘露降于國子監大成殿前柏木以張良
弼為湖廣行省參知政事討南陽襄樊詔博囉特穆爾
守冀寧博囉特穆爾遣巴拜殷興祖高托音倍道趨冀
寧守者不納丙戌命塔爾布斯為太尉守衛大鄂爾多
斯戊子熒惑犯井宿己亥察罕特穆爾遣陳秉直索珠
等以兵攻博囉特穆爾之軍于冀寧與博囉特穆爾部
將圖魯卜戰敗之時帝有旨以冀寧畀博囉特穆爾察

罕特穆爾以為用兵數年惟藉冀晉以給其軍而致盛
強苟奉旨與之則彼得以足其兵食乃託言用師汴梁
尋渡河就屯澤潞拒之調延安軍交戰于東勝州等處
再遣班布爾實以兵援之班布爾實謂彼軍奉旨而來
我何敢抗王命察罕特穆爾怒殺之十一月甲寅朔黃
河清凡三日博囉特穆爾以兵侵汾州察罕特穆爾拒
之癸酉賊犯易州十二月丙戌詔太廟影堂祭祀乃子
孫報本重事近兵興歲歉品物不能豐備累朝四祭減

為春秋二祭令宜復四祭後竟不行辛卯廣平路陷是
歲陽翟王阿勒呼木特穆爾擁兵數十萬屯于穆爾古
珠之地將犯京畿使來言曰祖宗以天下付汝汝已失
其大半若以國璽付我我當自為之帝遣報之曰天命
有在汝欲為則為之命樞密院事圖沁特穆爾等將兵
擊之不克軍士皆潰圖沁特穆爾走上都

元史卷四十五

元史卷四十五考證

至正十七年三月乙亥朔夏四月甲戌二十年正月丙辰八月壬寅 據元史類編乙亥下增朔字甲申改甲戌丙寅改丙辰據天文志壬辰改壬寅

十七年夏四月辛酉達實巴圖爾加太尉 本傳作三月又是年十月白不信等陷興元明史韓林兒傳作是年秋十九年春正月陳友諒陷信州守臣巴延布哈德濟力戰死本傳作是年六月

十二月庚子達實巴圖爾卒於軍中 按是月庚午朔
不應有庚子日而本傳亦書其卒為十二月庚子或
紀於書朔有誤

十八年三月毛貴據濟南 按續通鑑載濟南陷宣慰
使董搏霄死節事為最烈紀未特書

六月戊辰朔 按天文志是日日有食之紀失載

欽定四庫全書薈要卷六千四百二十五史部

元史卷四十六

明翰林學士亞中大夫知制誥兼修國史宋濂等修

本紀第四十六

順帝九

二十一年春正月癸丑朔詔赦天下命中書參知政事
七十往諭博羅特穆爾罷兵還鎮復遣使往諭察罕特
穆爾亦令罷兵博羅特穆爾縱兵掠冀寧等處察罕特

穆爾以兵拒之故有是命庚申太陰犯歲星乙丑河南賊犯杞縣察罕特穆爾討平之丁卯李思齊進兵平伏羌縣等處癸酉石州大風拔木六畜俱鳴民所持槍忽生火焰抹之即無搖之即有二月癸未朔填星退犯太微垣甲申同僉樞密院事特哩特穆爾復永平灤州等處己丑察罕特穆爾駐兵霍州攻博囉特穆爾壬寅太陰犯天江是月江南行臺侍御史巴咱爾布哈殺廣東廉訪使諤勒哲圖副使李思誠僉事特默齊以兵自衛

據廣州時已咱爾布哈以廉訪使久任專恣自用詔乃以諤勒哲圖等為廉訪司官而除已咱爾布哈侍御史已咱爾布哈不受命怒諤勒哲圖等代已誣以罪盡殺之惟廉訪使董鑰哀請得免三月丙辰太陰犯井宿癸酉察罕特穆爾調兵討永城縣又駐兵宿州擒賊將梁綿住庚辰癸亥犯鬼宿是月張士誠海運糧一十一萬石至京師博囉特穆爾罷兵還遣圖魯卜等引兵據延安以謀入陝張良弼出南山義谷駐藍田受節制於察

罕特穆爾良弼又陰結陝西行省平章政事鼎珠聽丞相特哩特穆爾調遣營于鹿臺夏四月辛巳朔日有食之是月以張良弼為陝西行省參知政事察罕特穆爾遣其子副詹事庫庫特穆爾貢糧至京師皇太子親與定約遂不復疑五月癸丑四川明玉珍陷嘉定等路李思齊遣兵擊敗之壬戌太陰犯房宿癸酉太白犯軒轅甲戌熒惑犯太白乙亥察罕特穆爾以兵侵博囉特穆爾所守之地是月李思齊受李武崔德等降六月乙未

熒惑歲星太白聚于翼宿丙申察罕特穆爾總兵討山東發晉軍下井陘出邯鄲過磁相懷衛踰白馬津發其軍之在汴梁者繼之水陸並進戊戌太陰犯雲雨甲辰太白晝見秋七月辛亥察罕特穆爾平東昌己巳忻州西北有赤氣蔽天如血是月察罕特穆爾進兵復冠州八月乙酉大同路北方夜有赤氣蔽天移時方散庚子以福建行省平章政事布哈特穆爾為江南行臺御史大夫癸卯大明兵取江州路時偽漢陳友諒據江州為

都至是退都武昌是月察罕特穆爾遣其子庫庫特穆爾閭思孝等會闊保浩爾齊等將兵由東河造浮橋以濟賊以二萬餘衆奪之闊保浩爾齊且戰且度拔長清討東平東平偽丞相田豐遣崔世英等出戰大破之乃遣使招諭田豐豐降東平平令豐為前鋒從大軍東討棣州俞寶降東平王士誠東昌楊誠等皆降魯地悉定進兵濟南劉珪降遂圍益都九月戊午陽翟王阿勒呼木特穆爾伏誅阿勒呼木特穆爾以宗親見天下盜賊

竝起乘隙肆為異圖詔少保知樞密院事婁章率諸軍
討之婁章遂敗其衆尋為部將同知太常禮儀院事托
歡所擒送闕下詔誅之于是加婁章太傅和寧王以阿
勒呼木特穆爾弟呼圖克特穆爾襲封陽翟王宗王囊
嘉特伊蘇烏爾圖華與托歡悉議加封壬戌四川賊兵
陷東川郡李思齊調兵擊之壬申命博囉特穆爾于保
定以東河間以南從便屯種是月命兵部尚書齊齊克
布哈侍郎韓祺徵海運糧于張士誠大明取建昌饒州

二路冬十月癸巳絳州赤氣見北方如火以察罕特穆爾為中書平章政事兼知河南山東等處行樞密院事陝西行臺御史中丞察罕特穆爾調參知政事陳秉直劉珪等守禦河南十一月戊申朔溫州樂清縣雷庚戌太陰犯建星癸亥太陰犯井宿戊辰黃河自平陸三門磧下至孟津五百餘里皆清凡七日命祕書少監程徐祀之壬申太陰犯氐宿是月察罕特穆爾李思齊遣兵圍鹿臺攻張良弼詔和解之俾各還信地兵乃解是歲

京師大饑屯田成收糧四十萬石賜司農丞胡東甌上尊金幣以旌其功

二十二年春正月戊申朔太白犯建星甲寅詔李思齊討四川張良弼平襄漢時兩軍不和故有是命乙卯填星退犯左執法庚申大明取江西龍興諸路時江西諸路皆陳友諒所據丁卯以太尉諤勒哲特穆爾為陝西行省左丞相仍命察罕特穆爾屯種于陝西申諭李思齊張良弼等各以兵自効以額森布哈為中書右丞二

月丁丑朔盜殺陝西行省右丞塔卜台己卯太白犯壘
壁陣乙酉彗星見于危宿光芒長丈餘色青白丁酉彗
星犯離宮西星至二月終光芒長二丈餘是月知樞密
院事圖沁特穆爾奉詔諭李思齊討四川時思齊退保
鳳翔使至思齊進兵益門鎮使還思齊復歸鳳翔三月
戊申彗星不見星形惟有白氣形曲竟天西指掃大角
壬子彗星行過太陽前惟有星形無芒在昴宿至戊午
始滅甲寅四川明玉珍陷雲南省治屯金馬山陝西行

省參知政事徹爾特穆爾等擊敗之擒明玉珍弟明二
己未御史大夫魯達實辭職不許是月命博囉特穆爾
為中書平章政事位第二加太尉張良弼受節制于博
囉特穆爾李思齊遣兵攻良弼至于武功良弼以伏兵
大破之夏四月丙子朔長星見其形如練長數十丈在
虛危之間後四十餘日乃滅丁亥熒惑離太陽三十九
度不見當出不出己丑詔諸王駙馬御史臺各衙門不
許占匿人民不當差役乙未賊新橋張陷安州博囉特

穆爾來請援兵是月紹興路大疫五月乙巳朔泉州賽
富鼎據福州路福建行省平章政事楊珠布哈擊敗之
餘衆航海還據泉州福建行省參知政事陳友定復汀
州路己未中書參知政事陳祖仁上章乞罷修上都宮
闕辛酉太陰犯建星辛未明玉珍據成都自稱隴蜀王
遣僞將楊尚書守重慶分兵寇龍州青州犯興元鞏昌
等路是月張士誠海運糧一十三萬石至京師六月辛
巳彗星見紫微垣光芒長尺餘東南指西南行戊子彗

星光芒掃上宰田豐及王士誠刺殺察罕特穆爾遂走入益都城衆乃推察罕特穆爾之子庫庫特穆爾為總兵官復圍益都詔贈察罕特穆爾推誠定遠宣忠亮節功臣開府儀同三司上柱國河南行省左丞相追封忠襄王謚獻武食邑沈邱縣令河南山東等處立廟長吏歲時致祭其父司徒阿敦賜良田二百頃起其子庫庫特穆爾授光祿大夫中書平章政事兼知河南山東等處行樞密院事同知詹事院事一應軍馬並聽節制仍

詔諭其將士曰凡爾將佐久為察罕特穆爾從事惟思
與義實同骨肉視彼逆黨不共戴天當力圖報復以伸
大義己亥益都賊兵出戰庫庫特穆爾生擒六百餘人
斬首八百餘級秋七月乙卯彗星滅跡丙辰熒惑見西
方須臾成白氣如長蛇光炯有文橫亘中天移時乃滅
是月河決范陽縣漂民居八月己亥庫庫特穆爾言博
囉特穆爾張良弼據延安掠黃河上下欲東渡以奪晉
寧乞賜詔諭癸巳太白犯畢宿九月癸卯朔劉福通以

兵援田豐至火星埤庫庫特穆爾遣關保邀擊大破之

甲辰以山北廉訪司權置于惠州丁未太白犯亢宿己

酉太陰犯斗宿癸亥歲星犯軒轅丙寅熒惑犯鬼宿戊

辰以伊蘇為遼陽行省左丞相仍總兵撫安迤東郡縣

己巳有流星如酒盃大色青白光明燭地熒惑犯鬼宿

積屍氣冬十月壬申朔江西行省平章圖烈布哈移檄

討已咱爾布哈時圖烈布哈分省廣州適邵宗愚陷廣

州執已咱爾布哈殺之甲戌博囉特穆爾南侵庫庫特

穆爾所守之地遂據真定路己卯太陰犯牛宿丁亥辰
星犯亢宿戊子太陰犯畢宿十一月乙巳庫庫特穆爾
復益都田豐等伏誅自庫庫特穆爾既襲父職身率將
士誓必復讐人心亦思自奮圍城益急賊悉力拒守乃
以壯士穴地通道而入遂克之盡誅其黨取田豐王士
誠之心以祭察罕特穆爾庚戌庫庫特穆爾遣關保復
莒州山東悉平庚申詔授庫庫特穆爾太尉銀青榮祿
大夫中書平章政事知樞密院事太子詹事仍便宜行

事襲總其父兵將校士卒論賞有差察罕特穆爾父阿
敦進封汝陽王察罕特穆爾改贈宣忠興運宏仁効節
功臣追封潁川王改諡忠襄癸亥四川賊兵陷青州十
二月壬辰太陰犯角宿庚子以中書平章政事佛嘉努
為御史大夫是歲樞密副使李士瞻上疏極言時政凡
二十條一曰悔已過以詔天下二曰罷造作以快人心
三曰御經筵以講聖學四曰延老成以詢治道五曰去
姑息以振乾綱六曰開言路以求得失七曰明賞罰以

厲百司八曰公選舉以息奔競九曰察近倖以杜奸弊
十曰嚴宿衛以備非常十一曰省佛事以節浮費十二
曰絕濫賞以足國用十三曰罷各官屯種俾有司經理
十四曰減常歲計置為諸宮用度十五曰招集散亡以
實八衛之兵十六曰廣給牛具以備屯田之用十七曰
獎勵守令以勸農務本十八曰開誠布公以禮待藩鎮十
九曰分遣大將急保山東二十曰依唐廣寧故事分道
進取先是薊國公托和齊上言乞罷三宮造作帝為減

軍匠之半還隸宿衛而造作如故故士瞻䟽首及之皇
太子常坐清寧殿分布長席列坐西番高麗諸僧皇太
子曰李好文先生教我儒書多年尚不省其義今聽佛
法一夜即能曉焉于是頗崇尚佛學帝以讒廢高麗王
已延特穆爾立塔斯特穆爾為王國人上書言舊王不
當廢新王不當立之故初皇后奇氏宗族在高麗恃寵
驕橫已延特穆爾屢戒飭不悛高麗王遂盡殺奇氏族
皇后謂太子曰爾年已長何不為我報讐時高麗王昆

弟有留京師者乃議立塔斯特穆爾為王而以奇族子
三寶努為元子以將作同知崔特穆爾為丞相以兵萬
人送之國至鴨綠江為高麗兵所敗僅餘十七騎還京
師詔加封唐撫州刺史南庭王危全諷為南庭忠烈靈
惠王

二十三年春正月壬寅朔四川明玉珍僭稱皇帝建國
號曰大夏紀元曰天統乙巳大寧陷庚戌歲星犯軒轅
二月戊戌太白晝見庚子亦如之是月庫庫特穆爾自

益都領兵還河南留索珠以兵守益都山東州縣立屯
田萬戶府三月辛丑朔彗星見東方經月乃減詔中書
平章政事阿爾布哈分省冀寧庫庫特穆爾遣兵據之
丙午大赦天下丁未親試進士六十二人賜巴拜楊輓
進士及第餘出身有差丙辰太白犯氐宿壬戌大同路
夜有赤氣亘天中侵北斗是月立廣西行中書省以廉
訪使額爾吉訥為平章政事時南方郡縣多陷沒惟額
爾吉訥獨保廣西者十五年立膠東行中書省及行樞

密院總制東方事以袁宏為參知政事是春關先生餘黨復自高麗還寇上都博囉特穆爾擊敗之夏四月辛丑熒惑犯歲星博囉特穆爾李思齊互相交兵庚申歲星犯軒轅是月庫庫特穆爾遣摩該等以兵擊張良弼五月己巳朔張士誠海運糧十三萬石至京師壬午太白晝見甲午亦如之乙未熒惑犯右執法是月瓜哇使淡濛加加殿進金表貢方物六月戊戌朔博囉特穆爾遣方托克托迎匡福於彰德庫庫特穆爾遣兵追之敗還

匡福遂據保定路己亥庫庫特穆爾部將岱律等駐
兵藍田七盤李思齊攻圍興平遂據盤屋博囉特穆爾
時奉詔進討襄漢而岱律阻道于前思齊踵襲于後乃
請催督庫庫特穆爾東出潼關道路既通即便南討戊
申博囉特穆爾遣珠展等入陝西據其省治時陝西行
省右丞達實特穆爾與行臺有隙且恐陝西為庫庫特
穆爾所據陰結於博囉特穆爾請珠展入城劫御史大
夫諤勒哲特穆爾監察御史張可遵等印後屢使召諤

勒哲特穆爾珠展拘留不遣庫庫特穆爾遣將摩該與
李思齊合兵攻之珠展出降遂從庫庫特穆爾庚戌星
隕于濟南龍山入地五尺甲寅詔授江南下第及後期
舉人為路府州儒學教授乙卯太白犯井宿丁巳絳州
有白虹二道衝斗牛間庚申平陽路有白氣三道一貫
北極一貫北斗一貫天漢至夜分乃滅壬戌太白晝見
夜犯井宿秋七月戊辰朔京師大雹傷禾稼丁丑以馬
良為中書參知政事乙酉太白晝見有星墜于慶元路

西北聲如雷光芒數十丈久之乃滅八月丁酉朔倭人
寇蓬州守將劉暹擊敗之自十八年以來倭人連寇瀕
海郡縣至是海隅遂安辛丑庫庫特穆爾遣兵侵博囉
特穆爾所守之境壬寅太白犯軒轅乙巳太陰犯建星
丁未太白犯軒轅己酉太白晝見丙辰太陰犯畢宿沂
州有赤氣亘天中有白色如蛇形徐徐西行至夜分乃
滅戊午博囉特穆爾言庫庫特穆爾踵襲父惡有不臣
之罪乞賜處置己未太白晝見辛酉太白犯歲星乙丑

太白犯右執法是月大明兵與僞漢兵大戰于鄱陽湖
陳友諒敗績而死其子理自立仍據武昌為都改元德
壽大明兵遂進圍武昌九月丁卯朔遣瓜哇使淡濛加
加殿還國詔賜其國主三珠金虎符及織金文幣辛未
太白犯左執法乙亥歲星犯右執法丁丑辰星犯填星
丁亥太白犯填星辰星犯亢宿是月張士誠自稱吳王
來請命不報遣戶部侍郎博囉特穆爾等徵海運于張
士誠士誠不與冬十月丙申朔青齊一方赤氣千里癸

卯太白犯氐宿甲辰湖廣僞姚平章張知院陰遣人言
於庫庫特穆爾設計擒殺僞漢主陳理及僞夏主明玉
珍不果已酉監察御史敏珠爾哈雅劾奏太傅太平罪
狀詔安置太平于陝西之西仍拘收宣命并御賜等物
戊午太白犯房宿是月庫庫特穆爾遣僉樞密院事任
亮復安陸府博囉特穆爾遣兵攻冀寧至石嶺關庫庫
特穆爾大破走之擒其將烏瑪刺殷興祖博囉特穆爾
軍由是蹶十一月壬申御史臺臣言故右丞相托克托

有大臣之體向在中書政務修舉深懼滿盈自求引退
加封鄭王固辭不受再秉鈞軸克濟艱危統軍進征平
徐州收六合大功垂成浮言構難奉詔謝兵就貶以沒
已蒙錄用其子還所籍田宅更乞憫其勲舊還其所授
宣命從之癸未太陰犯軒轅歲星犯左執法是歲御史
大夫魯達實與知樞密院事圖沁特穆爾得罪于皇太
子皆奔大同博囉特穆爾匿之營中

二十四年春正月戊寅太白犯軒轅庚辰保德州民家

產豬一頭兩脚二月壬子歲星犯左執法癸丑太陰犯
西咸池是月大明滅僞漢其所據湖南北江西諸郡皆
降于大明三月乙亥監察御史王圖烈圖崔巴延特穆
爾等諫皇太子勿親征辛卯詔以博囉特穆爾匿魯達
實謀為悖逆解其兵權削其官爵候道路開通許還四
川田里博囉特穆爾拒命不受夏四月甲午朔命庫庫
特穆爾討博囉特穆爾乙未太陰犯西咸池博囉特穆
爾悉知詔令調遣之事非出帝意皆右丞相吹斯噶所

為遂令圖沁特穆爾舉兵向闕壬寅圖沁特穆爾兵入
居庸關癸卯知樞密院事伊蘇詹事布呼齊迎戰于皇
后店布呼齊力戰伊蘇不援而退布呼齊幾為所獲脫
身東走甲辰皇太子率衛兵出光熙門東走古北口趨
興松乙巳圖沁特穆爾兵至清河列營時都城無備城
中大震令百官吏卒分守京城使達勒達國師至其軍
問故以必得吹斯噶及宦官保布哈為對詔慰解之不
聽丁未詔屏吹斯噶于嶺北竄保布哈于甘肅執而與

之復博羅特穆爾前官仍總兵以伊蘇為左丞相庚戌
圖沁特穆爾陳兵自健德門入覲帝于延春閣慟哭請
罪帝就宴賚之加博羅特穆爾太保依前守禦大同圖
沁特穆爾為中書平章政事辛亥圖沁特穆爾軍還皇
太子至魯爾嶺詔追及之還宮癸丑太白犯井宿甲子
黃河清戊辰庫庫特穆爾奉命討博羅特穆爾屯兵冀
寧其東道以白索珠領兵三萬守禦京師中道以摩該
珠展領兵四萬西道以關保領兵五萬合擊之關保等

兵逼大同博囉特穆爾留兵守大同而自率兵與圖沁
特穆爾魯達實復大舉向闕甲戌太白犯鬼宿乙亥又
犯積屍氣歲星犯左執法六月癸卯三星晝見白氣橫
突其中甲辰河南府有大星夜見南方光如晝丁未大
星隕照夜如晝及旦黑氣晦暗如夜甲寅白索珠以兵
至京師請皇太子西行丁巳太白犯右執法是月保德
州黃龍見井中秋七月癸亥太白與歲星合于翼宿甲
子歲星犯左執法丙戌博囉特穆爾前鋒軍入居庸關

皇太子親率軍禦于清河伊蘇軍于昌平軍士皆無鬪
志皇太子馳還都城白索珠引兵入平則門丁亥白索
珠扈從皇太子出順承門由雄霸河間取道往冀寧戊
子博囉特穆爾駐兵健德門外與圖沁特穆爾魯達實
入見帝于宣文閣訴其非罪皆泣帝亦泣乃賜宴博囉
特穆爾欲追襲皇太子魯達實止之庚寅詔以博囉特
穆爾為中書左丞相魯達實為中書平章政事圖沁特
穆爾為御史大夫其部屬布列省臺百司以伊蘇知樞

密院事詔諭博囉特穆爾庫庫特穆爾俱朕股肱視同
心膂自今各棄宿忿弼成大勲是月大明兵取廬州路
八月壬辰朔日有食之乙未熒惑犯鬼宿壬寅詔以博
囉特穆爾為中書右丞相監修國史節制天下軍馬乙
巳皇太子至冀寧乙卯張士誠自以其弟士信代達實
特穆爾為浙江行省左丞相是月博囉特穆爾請誅狎
臣圖魯特穆爾布達斡爾密罷三宮不急造作沙汰宦
官減省錢糧禁止西番僧人好事九月辛酉朔宦官斯

隆尼潛送宮女布呼圖出自順承門以達于皇太子乙丑太白晝見癸酉夜天西北有紅光至東而散甲申太陰犯軒轅是月大明兵取中興及歸峽潭衡等路冬十月丙午太陰犯畢宿己酉太陰犯井宿己未詔皇太子還京師命伊蘇魯達實分道總兵十二月乙卯太陰犯太白

二十五年春正月癸亥封李思齊為許國公丙寅太白晝見戊辰亦如之己巳大明兵取寶慶路守將唐隆道

遁走偽漢守將熊天瑞以贛州及韶州南雄降于大明
甲戌太白犯建星壬午監察御史博羅特穆爾賈彬等
辯明哈瑪爾舒蘇之罪二月辛丑汴梁見日傍有一月
一星丙午太陰犯填星戊午皇太子在冀寧命甘肅行
省平章政事多爾濟巴勒以岐王阿拉克奇爾軍馬會
平章政事臧卜李思齊各以兵守寧夏三月庚申皇太
子諭庫庫特穆爾軍中曰博羅特穆爾襲據京師余既
受命總督天下諸軍恭行顯罰少保中書平章政事庫

庫特穆爾躬勒將士分道進兵諸王駙馬及陝西平章
政事李思齊等各統軍馬尚其奮義戮力剋期恢復丙
寅博囉特穆爾幽置皇后奇氏于諸色總管府丁卯命
魯達實拜特穆爾並為御史大夫戊辰太白犯壘壁陣
夏四月庚寅博囉特穆爾至諸色總管府見皇后奇氏
令還宮取印章作書遺皇太子遣內侍諤勒哲圖持往
冀寧復出皇后幽之乙巳關保等兵進圍大同壬子熒
惑犯靈臺乙卯關保入大同五月辛酉熒惑犯太微垣

甲子京師天雨菴長尺許或言于帝曰龍絲也命拾而
祀之乙亥大明兵破安陸府守將任亮迎戰被執己卯
大明兵破襄陽路是月侯布延達實奉威順王自雲南
經蜀轉戰而出至成州欲之京師李思齊俾乚田于成
州六月戊子以黎安道為中書參知政事辛丑湖廣行
省左丞周文貴復寶慶路乙巳皇后奇氏自幽所還宮
乙卯以太尉和尼齊為御史大夫是月皇太子加李思
齊銀青榮祿大夫邠國公中書平章政事皇太子詹事

兼四川行樞密院事虎符招討使分中書四部秋七月
丁丑填星歲星熒惑聚于角亢太陰犯畢宿己卯太陰
犯畢宿乙酉博羅特穆爾伏誅圖沁特穆爾魯達實皆
遁走丙戌遣使函博羅特穆爾首往冀寧召皇太子還
京大赦天下黎安道方托克托雷一聲皆伏誅是月京
師大水河決小流口達于清河八月丁亥朔京城門至
是不開者三日珠展摩該軍至城外命軍士緣城而上
碎平則門鍵悉以軍入占民居奪民財乙未太陰犯建

星己亥太白犯壘壁陣癸卯詔命皇太子分調將帥戡
定未復郡邑即還京師行事之際承制用人並准正授
丁未皇后鴻吉哩氏崩壬子以洪巴拜特古斯布哈訥
呼圖並為中書平章政事九月庫庫特穆爾扈從皇太
子至京師丁丑太陰犯井宿壬午詔以巴咱爾為太師
中書右丞相監修國史庫庫特穆爾為太尉中書左丞
相錄軍國重事同監修國史知樞密院事兼太子詹事
是月以方國珍為淮南行省左丞相分省慶元冬十月

辛卯熒惑犯天江壬寅以哈刺章為知樞密院事丁未
益王昆都特穆爾樞密副使觀音努擒魯達實誅之圖
沁特穆爾以餘兵往巴爾斯之地命嶺北行省左丞相
舒蘇及知樞密院事魏賽音布哈同討之戊申以資政
院使圖魯為御史大夫己酉熒惑犯斗宿太陰犯右執
法庚戌太陰犯太微垣閏月庚申以賓國公五十八為
知樞密院事詔張良弼俞寶孔興等悉聽調於庫庫特
穆爾戊辰太白辰星熒惑聚于斗宿太陰犯畢宿辛未

詔封庫庫特穆爾河南王代皇太子親征總制關陝晉
冀山東并迤南一應軍馬諸王各愛滿應該總兵統兵
領兵等官凡軍民一切機務錢糧名爵黜陟悉聽便宜
行事壬申太白犯辰星辛巳以托克托穆爾為中書右
丞達實特穆爾為參知政事十一月己丑太白犯熒惑
太陰犯壘壁陣丙申太陰犯畢宿癸卯太陰犯太微垣
是月大明兵取泰州時泰州通州高郵淮安徐州宿州
泗州濠州安豐諸郡皆張士誠所據十二月乙卯詔立

次皇后奇氏為皇后改奇氏為索隆噶氏詔天下仍封
奇氏父以上三世皆為王爵癸亥太陰犯畢宿以特哩
實克為中書參知政事庚午歲星掩房宿辛未太陰犯
右執法是月圖沁特穆爾伏誅

元史卷四十六

元史卷四十六考證

至正二十一年秋七月 按續通考是年七月辛酉朔
日食又二十七年二月朔日食本紀及天文志俱不
載其書辛酉亦與紀中干支不合

十一月戊辰黃河清凡七日命秘書少監程徐祀之
元史類編作記之

二十二年九月癸亥二十五年十一月己丑十二月庚
午 癸亥訛丁亥庚午訛庚子據天文志改己丑上

原本脫十一月據天文志增

察罕特穆爾父阿敦 阿敦原文阿都溫此作阿魯溫

係一人今畫一改





總校官編修臣吳紹濬

欽定四庫全書薈要

史部
元史卷四十七

詳校官主事銜臣徐以坤



欽定四庫全書舊要卷六千四百二十六 史部

元史卷四十七

明翰林學士亞中大夫知制誥兼修國史宋濂等修

紀第四十七

順帝十

二十六年春正月己酉以崇政院使博囉實勒為御史大夫壬子以溫扎木知樞密院事是月以薩蘭托里為中書左丞相命燕南河南山東陝西河東等處舉人會

試者增額數進士及第以下遞升官一級二月癸丑朔
立河淮水軍元帥府于益津縣甲戌詔天下以比者逆
臣博囉特穆爾圖沁特穆爾魯達實等干紀亂倫內外
之民經值軍馬致使困乏與免一切雜泛差徭是月庫
庫特穆爾還河南分立省部以自隨尋居懷慶又居彰
德調度各處軍馬陝西張良弼拒命三月癸未朔罷洛
陽嵩縣宣慰司丁亥白虹五道亘天其第三道貫日又
氣橫貫東南良久始滅甲午庫庫特穆爾遣關保浩爾

齊以兵西攻張良弼于鹿臺李思齊圖魯卜孔興等兵
皆與良弼合以曼濟托克托穆爾知樞密院事乙未廷
試進士七十二人賜哈達布哈張棟進士及第餘出身
有差監察御史伊里布建言八事一曰用賢二曰申嚴
宿衛三曰保全臣子四曰八衛屯田五曰禁止奏請六
曰培養人才七曰罪人不孥八曰重惜名爵帝嘉納之
是月大明兵取高郵府夏四月辛酉詔立皇太子妃鄂
齊爾蘇達勒氏是月大明兵取淮安路徐州宿州濠州

泗州潁州安豐路五月壬午朔洛陽麥生一莖四穗甲辰以托克托布哈為御史大夫六月壬子朔汾州介休縣地震平遙縣大雨雹紹興路山陰縣臥龍山裂己未命知樞密院事瑪魯以兵守直沽命河間鹽運使拜珠曹履亨撫諭沿海竈戶俾出丁夫從瑪魯征討丙寅詔英宗時謀為不軌之臣其子孫或成丁者可安置舊地幼者隨母居草地終身不得入京城及不得授官止許於本愛滿應役皇后索隆噶氏生日百官進箋皇后諭

薩蘭托里等曰自世祖以來正宮皇后壽日不曾進箋
近年雖行不合典故却之秋七月辛巳朔日有食之徐
溝縣地震介休縣大水石州大星如斗自西南而落甲
申以李思齊為太尉甲午太白經天丙申庫庫特穆爾
遣朱珍盧旺屯兵河中遣關保浩爾齊合兵渡河會珠
展商暘且約李思齊以攻張良弼良弼遣子弟質于思
齊與良弼拒守關保等不利思齊請詔和解之丙午太
白經天八月戊寅以李國鳳為中書左丞陳友定為福

建行省平章政事九月甲申李思齊兵下鹽井獲川賊
余繼隆誅之禮部侍郎滿尚賓吏部侍郎溫都爾罕自
鳳翔還京師先是尚賓等持詔諭思齊開通川蜀道路
思齊方兵爭不奉詔尚賓等留鳳翔一年至是始還丙
戌以方國珍為江浙行省左丞相弟國瑛國珉姪明善
竝為江浙行省平章政事己亥以中書平章政事實勒
們為御史大夫辛丑孛星見東北方冬十月甲子庫庫
特穆爾遣弟托音特穆爾及摩該諤勒哲等駐兵濟南

以控制山東十一月甲申大明兵取湖州路丙申大明兵取杭州路及紹興路辛丑大明兵取嘉興路時湖州杭州紹興嘉興松江平江諸路及無錫州皆張士誠所據十二月庚午蒲城洛水和順崖崩

二十七年春正月乙未絳州夜聞天鼓鳴將旦復鳴其聲如空中戰鬪者庚子大明兵取松江府癸卯大明兵取沅州路是月李思齊張良弼圖魯卜自會于含元殿基推李思齊為盟主同拒庫庫特穆爾二月庚申以邁

珠為雲國公七十為中書平章政事伊嚕布哈為御史大夫乙丑以詹事伊嚕特穆爾為御史大夫三月丁丑朔萊州大風有大鳥至其翅如席庫庫特穆爾遣兵屯滕州以禦王信庚子京師大風自西北起飛砂揚礫白日昏暗夏五月丙子朔白氣二道亘天以去歲水潦霜災嚴酒禁戊寅以空名宣勅遣福建行省命平章政事庫春陳有定同驗有功者給之辛巳大同隕霜殺麥癸未福建行宣政院以廢寺錢糧由海道送京師乙酉以

諤勒哲特穆爾為中書右丞相辭以老病不許辛卯以
知樞密院事實勒們為嶺北行省左丞相提調分通政
院己亥以溫普為中書平章政事辛丑庫庫特穆爾定
擬所屬官員二千六百一十人從之是月山東地震雨
白麓李思齊遣張良弼部將郭謙等守黃連寨庫庫特
穆爾部將關保浩爾齊商噶珠展引兵拔其寨郭謙走
會摩該等為變關保浩爾齊夜遁李思齊遂解而西六
月丙午朔日有食之晝晦丁巳皇太子寢殿後新甃井

中有龍出光燄爍人宮人震懾仆地又長慶寺有龍纏繞槐樹飛去樹皮皆剝丁卯沂州山崩是月知樞密院事壽安奉空名宣勅與侯巴延達實令其以兵援庫庫特穆爾時李思齊據長安與商高拒戰侯巴延達實進兵攻李思齊秦州守將蕭公達降思齊思齊知關保等兵退遣蔡琳等破其營侯巴延達實奔潰秋七月甲申命伊蘇提調武備寺丁酉絳州星隕光耀如晝是月李思齊遣許國佐薛穆飛會張良弼圖魯卜兵屯于華陰

時命圖嚕為陝西行省左丞相思齊不悅遣其部將鄭
應祥守陝西而自還鳳翔龍見於臨朐龍山大石起立
八月丙午詔命皇太子總天下兵馬其略曰元良重任
職在撫軍稽古徵今卓有成憲曩者障塞決河本以拯
民昏墊豈期妖盜橫造訛言簧鼓愚頑塗炭郡邑殆遍
海內茲逾一紀故察罕特穆爾仗義興師獻功敵愾迅
掃汴洛克平青齊為國捐軀深可哀悼其子庫庫特穆
爾克繼先志用成駿功阿裕爾實哩達喇計安宗社累

請出師朕以國本至重詎宜輕出遂授庫庫特穆爾總
戎重寄畀以王爵俾代其行李思齊張良弼等各懷異
見構兵不已至盜賊愈熾深遺朕憂況全齊密邇輦轂
儻失早計恐生異圖詢諸衆謀僉謂皇太子聰明仁孝
文武兼資聿遵舊典爰命以中書令樞密使悉總天下
兵馬諸王駙馬各道總兵將吏一應軍機政務生殺予
奪事無輕重如出朕裁其庫庫特穆爾總領本部軍馬
自潼關以東肅清江淮李思齊總統本部軍馬自鳳翔

以西與侯巴延達實進取川蜀以少保圖嚙為陝西行
中書省左丞相本省駐劄總本部及張良弼孔興圖魯
卜各枝軍馬進取襄樊王信本部軍馬固守信地別聽
調遣詔書到日汝等悉宜洗心滌慮同濟時艱庚戌摩
該殺衛輝守禦官余仁輔彰德守禦官范國英引軍至
清化聞懷慶有備遂還彰德上疏言人臣以尊君為本
以盡忠為心以愛民為務今總兵官庫庫特穆爾歲與
官軍讎殺臣等乃朝廷培養之人素知忠義焉能俛首

聽命乞降明詔別選重臣以總大兵詔以庫庫特穆爾
不遵君命宜黜其兵權就令摩該討之辛亥特穆爾布
哈進封淮王賜金印設王傅等官壬子為皇太子立大
撫軍院秩從一品知院四員同知二員副使同僉各一
員經歷都事各二員管勾一員癸丑封太師巴咱爾永
平王甲寅以右丞相諤勒哲特穆爾翰林承旨達爾瑪
平章政事諤勒哲特穆爾竝知大撫軍院事丙辰諤勒
哲特穆爾言大撫軍院專掌軍機今後迤北軍務仍舊

樞密院管餘內外諸王駙馬諸總兵統兵行省行院宣
慰司一應軍情不許隔越徑行移大撫軍院詹事院同
知李國鳳同知大撫軍院事參政諤勒哲特穆爾為副
使左司員外郎耀珠樞密參議王宏遠為經歷庚申諤
勒哲特穆爾言諸軍將士有能效順立奇功者請所賞
宣勒依常制外加以忠義功臣之號從之辛酉以諤勒
哲特穆爾仍前少師知樞密院事伊蘇仍前太保中書
右丞相特哩特穆爾以太尉添設中書左丞相丙寅立

行樞密院于阿南達察汗諾爾命陝西行省左丞相圖
魯仍前少保兼知行樞密院事壬申命特哩特穆爾仍
前太尉左丞相為知大撫軍院事中書右丞陳敬伯為
中書平章政事九月甲戌朔義士戴晉生上皇太子書
言治亂之由命右丞相伊蘇以兵往山東命參知政事
巴圖呼喇勒分戶部官一同供給丁丑以兵起迤南民
供給繁重其真定河南陝西山東冀寧等處除軍人自
耕自食外與免民間今年田租之半其餘雜泛一切住

罷辛巳大明兵取平江路執張士誠乙酉大明兵取通

州丁亥大明兵取無錫州己丑詔伊蘇以中書右丞相

分省山東薩蘭托里以中書左丞相分省大同丙申太

師旺嘉努追封克王諡忠靖己亥命特哩特穆爾提調

端本堂及領經筵事辛丑大明兵取台州路時台州溫

州慶元三路皆方國珍所據冬十月甲辰朔摩該以兵

入山西定孟州忻州下灤州遂攻真定詔伊蘇自河間

以兵會摩該取真定己而不克命伊蘇還河間摩該還

彰德乙巳皇太子奏以淮南行省平章政事王信為山東行省平章政事兼知行樞密院事立中書分省于真定路丙午加司徒淮南行省平章政事王宣為沂國公丁未享于太廟壬子詔落庫庫特穆爾太傅中書左丞相并諸兼領職事仍前河南王錫以汝州為其食邑其弟托音特穆爾以集賢學士同庫庫特穆爾于河南府居其帳前諸軍命索珠浩爾齊一同統之其河南諸軍命中書平章政事內史李克彞統之關保本部諸軍仍

舊統之山東諸軍命太保中書右丞相伊蘇統之山西
諸軍命少保中書左丞相薩蘭托里統之河北諸軍命
知樞密院事摩該統之赦天下甲寅以和尼齊為中書
平章政事乙丑命集賢大學士丁好禮為中書添設平
章政事丙寅平章內史關保封許國公己巳大明兵取
溫州十一月壬午大明兵取沂州守臣王信遁執其父
宣癸未大明兵取慶元路丙戌以平章政事伊嚕特穆
爾知樞密院事諤勒哲特穆爾平章政事巴延特穆爾

特哩實克竝知撫軍院事戊子大明兵取澤州乙未以
知樞密院事摩該為中書平章政事太尉中書左丞相
特哩特穆爾為撫軍院使丁酉命特哩特穆爾同監修
國史命關保分省于晉寧辛丑大明兵取益都路平章
政事已拜降宣慰使布延布哈總管胡濬知院張俊皆
死之十二月癸卯朔日有食之丁未大明兵取般陽路
戊申大明兵取濟寧路陳秉直遁己酉大明兵取萊州
遂取濟南及東平路丁巳大明兵入杉關取邵武路時

邵武建寧延平福州興化泉漳汀潮諸路皆陳友定所據庚申以楊誠陳秉直竝為國公中書平章政事甲子命右丞相伊蘇太尉知院托和齊中書平章政事和琳台平章政事摩該知樞密院事希扎丹津特穆爾江文清律爾等會楊誠陳秉直巴延布哈俞勝各部諸軍同守禦山東又命關保往援山東丙寅以章嘉為中書參知政事庚午大明兵由海道取福州守臣平章政事庫春遁行宣政院使托蘭死之是月方國珍歸于大明詔

命陝西行省左丞相圖魯總統張良弼圖魯卜孔興各
枝軍馬以李思齊為副總統禦關中撫安軍民圖魯卜
孔興等出潼關及取順便山路渡黃河合勢東行共勤
王事思齊等皆不奉命是歲詔分潼關以西屬李思齊
以東屬庫庫特穆爾各罷兵還鎮于是關保退屯潞州
商曷留屯潼關

二十八年春正月壬申朔皇太子命關保固守晉寧總
統諸軍如庫庫特穆爾拒命當以大義相裁就便擒擊

以中書平章政事已延特穆爾為御史大夫辛巳詔諭
庫庫特穆爾曰比者伊蘇上奏卿以書陳情深自悔悟
及省來意良用惻然朕視卿猶子卿何惑于儉言不體
朕心隳其先業卿今能自悔固朕所望卿其思昔委任
肅清江淮之意即將冀寧真定諸軍就行統制渡河直
擣徐沂以康靖齊魯則職任之隆當悉還汝衛輝彰德
順德皆為王城卿無以摩該為名縱軍侵暴其晉寧諸
軍已命關保總制策應戡定山東將帥各宜悉心庚寅

彗星見于昴畢之間是月大明兵取建寧延平二路陳友定被執二月壬寅朔詔削庫庫特穆爾爵邑命圖嚕李思齊等討之詔曰庫庫特穆爾本非察罕特穆爾之宗俾嗣職任冀承遺烈畀以相位陟以師垣崇以王爵授以兵柄顧乃憑藉寵靈遂肆跋扈構兵關陝專事吞併摩該倡明大義首發姦謀關保弗信邪言乃心王室陳其罪惡請正邦典今圖嚕李思齊其率兵東下共行天討癸卯武庫災癸丑大明兵取東昌路守將申榮王

輔元死之丙辰庫庫特穆爾自澤州退守晉寧關保守

澤潞二州與摩該軍合己未大明兵取寶慶路甲子汀
州路總管陳谷珍以城降于大明丙寅大明兵取棣州
是月大明兵至河南李思齊張良弼等解兵西還詔命
知樞密院事托和齊平章政事魏賽音布哈進兵攻晉
寧李思齊次渭南張良弼次櫟陽興化泉州漳州潮州
四路皆降于大明二月庚寅彗星見于西北壬辰翰林
學士承旨王時太常院使陳祖仁上章乞撫諭庫庫特

穆爾以兵勤王赴難是月有星流于東北衆小星隨之
其聲大震大明兵取河南李思齊張良弼會兵駐潼關
火焚良弼營思齊移軍葫蘆灘調其所部張德斂穆薛
飛守潼關大明兵入潼關攻李思齊營思齊棄輜重奔
于鳳翔是月大明兵取永州路又取惠州路夏四月辛
丑朔大明兵取英德州丙午隕霜殺菽戊申大明兵取
廣州路又取嵩陝汝等州五月庚午朔大明兵取道州
李克彝棄河南城奔陝西推李思齊為總兵駐兵岐山

是月思齊部將浩爾齊托克托張意據盤屋商曷據武功李克彝據岐山任從政據隴州六月庚子朔徐溝縣地震癸丑大明兵取全州郴州梧州藤州潯州貴象鬱林等郡甲寅雷雨中有火自天墜焚大聖壽萬安寺壬戌臨州保德州地震五日不止大明兵取靜江路是月廣西諸郡縣皆附于大明秋七月癸酉京城紅氣滿空如火照人自旦至辰方息乙亥京城黑氣起百步內不見人從寅至巳方息摩該關保以兵攻晉寧是月李思

齊會李克彝商高張意圖魯卜等于鳳翔海南海北諸
郡縣皆降于大明閏月己亥朔庫庫特穆爾與摩該開
保戰敗之擒開保摩該遣其斷事官以聞詔開保摩該
間謀構兵可依軍法處治開保摩該皆被殺辛丑大明
兵取衛輝路癸卯大明兵取彰德路乙巳左江右江諸
路皆降于大明丁未大明兵取廣平路丁巳詔罷大撫
軍院誅知大撫軍院事巴延特穆爾等詔復命庫庫特
穆爾仍前河南王太傅中書左丞相統領見部軍馬由

中道直抵彰德衛輝太保中書右丞相伊蘇統大軍由
東道水陸竝進少保陝西行省左丞相圖魯統關陝諸
軍東出潼關攻取河洛太尉平章政事李思齊統軍馬
南出七盤金商克復汴洛四道進兵犄角勦捕毋分彼
此秦國公平章知樞密院溫普平章索珠等軍東西布
列乘機掃殄太尉遼陽左丞相額森布哈郡王知樞密
院呼遜等軍捍禦海口藩屏畿輔皇太子阿裕爾實哩
達喇總天下兵馬裁決庶務具如前詔壬戌白虹貫日

癸亥罷內府河役甲子庫庫特穆爾自晉寧退守冀寧
大明兵至通州知樞密院事巴延特穆爾力戰被擒死
之左丞相實勒們傳旨令太常禮儀院使鄂勒歡等奉
太廟列室神主與皇太子同北行鄂勒歡等即至太廟
與署令王嗣宗太祝哈喇布哈襲護神主畢仍留室內
乙丑白虹貫日罷內府興造詔淮王特穆爾布哈監國
慶通為中書左丞相同守京城丙寅帝御清寧殿召后
妃皇太子太子妃同議避兵北行左丞相實勒們及知

樞密院事哈斯官者趙巴延布哈等諫以為不可行不聽巴延布哈慟哭諫曰天下者世祖之天下陛下當以死守奈何棄之臣等願率軍民及諸集賽台出城拒戰願陛下固守京城卒不聽至夜半開健德門北奔八月庚午大明兵入京城元亡後一年帝駐于應昌府又一年四月丙戌帝痢疾殂于應昌壽五十一在位二十六年太尉諤勒哲院使觀音努奉梓宮北葬五月癸卯大明兵襲應昌府皇孫密迪哩巴拉及后妃并寶玉皆被

獲皇太子阿裕爾實哩達喇從十數騎遁大明皇帝以
帝知順天命退避而去特加其號曰順帝而封密迪哩
巴拉為崇禮侯

元史卷四十七

元史卷四十七考證

至正二十七年八月壬申九月丁丑二十八年八月庚
午 壬申訛壬辰據舊本改丁丑訛丁亥據元史類
編改庚午訛庚申推干支改

秦國公平章知樞密院溫普郡王知樞密院和遜左丞
相實勒們 按知院為樞密長據百官志加樞密字
實勒們上脫左丞相據續通鑑增

欽定四庫全書

